



REPUBLIKA E SHQIPËRISË

KUVENDI

Komisioni për Çështjet Ligjore, Administratën Publike dhe të Drejtat e Njeriut

Dokument Parlamentar

Tiranë, më 10.07.2018

RAPORT PËR PROJEKTLIGJIN

“PËR RATIFIKIMIN E MARRËVESHJES FINANCIARE, NDËRMJET KËSHILLIT TË MINISTRAVE TË REPUBLIKËS SË SHQIPËRISË, TË PËRFAQËSUAR NGA MINISTRIA E FINANCave DHE EKONOMISË, DHE CASSA DEPOSITI E PRESTITI S.P.A, PËR PROGRAMIN E ARSIMIT DHE FORMIMIT PROFESIONAL NËPËRMJET INOVACIONIT”

Komisioni për Çështjet Ligjore, Administratën Publike dhe të Drejtat e Njeriut, në cilësinë e Komisionit për dhënie mendimi, në mbledhjen e datës 10.07.2018, mori në shqyrtim projektligjin “Për ratifikimin e marrëveshjes financiare, ndërmjet Këshillit të Ministrave të Republikës së Shqipërisë, të përfaqësuar nga Ministria e Financave dhe Ekonomisë dhe Cassa Depositi e Prestiti s.p.a “Për programin e arsimit dhe formimit profesional nëpërmjet inovacionit””.

Komisioni për Çështjet Ligjore, Administratën Publike dhe të Drejtat e Njeriut caktoi relator për shqyrtimin e këtij projektligji deputeten Vasilika Hysi.

Në mbledhjet e Komisionit për të mbrojtur projektligjin dhe për të dhënë shpjegime për pyetjet e anëtarëve të Komisionit ishin të pranishëm përfaqësues të Ministrisë së Financave dhe Ekonomisë.

I. BAZA KUSHTETUESE E PROJEKTLIGJIT

Projektligji i paraqitur për shqyrtim është propozuar nga Këshilli i Ministrave, sipas përcaktimeve të neneve 78, 83 pika 1 të Kushtetutës së Republikës së Shqipërisë dhe shoqërohet me relacionin përkatës sipas nenit 68 të Rregullores së Kuvendit.

Ratifikimi i kësaj marrëveshje bazohet në Kushtetutën e Republikës së Shqipërisë, Kreu II “Marrëveshjet Ndërkombëtare”, neni 121 i saj.

II. QËLLIMI DHE PËRMBAJTJA E PROJEKTLIGJIT

Projektligji ka për qëllim ratifikimin e marrëveshjes financiare, ndërmjet Këshillit të Ministrave të Republikës së Shqipërisë, të përfaqësuar nga Ministria e Financave dhe Ekonomisë, dhe Cassa Depositi e Prestiti s.p.a. për programin e arsimit dhe formimit profesional nëpërmjet inovacionit, për akordimin e një huaje të butë, në vlerën 5 milionë euro.

Marrëveshja financiare paraqitet në vijim të marrëveshjes qeveritare dypalëshe ratifikuar me ligjin nr.51/2017, “Për ratifikimin e marrëveshjes, ndërmjet Këshillit të Ministrave të Republikës së Shqipërisë dhe qeverisë së Republikës së Italisë, për programin “Në mbështetje të arsimit dhe formimit (AFP) nëpërmjet inovacionit”.

Marrëveshja synon përbushjen e objektivave të Strategjisë Kombëtare për Punësim dhe Aftësi (SKPA) 2014 - 2020, për të pasur një ekonomi konkurruese dhe një shoqëri gjithëpërfshirëse, që mbështetet në aftësi më të larta dhe punësim më të mirë.

Sigurimi i këtij financimi garanton mbështetjen dhe fuqizimin e dy shkollave profesionale me drejtim bujqësinë, veterinarinë, mekanikën bujqësore etj., të cilat janë shumë të rëndësishme për ekonominë e vendit tonë dhe sidomos, në rajonin ku këto shkolla kryejnë aktivitetin e tyre.

Rezultatet e pritshme nga ky projekt janë të lidhura me:

- i. Organizimin dhe zhvillimin në mënyrë të plotë të Shkollës Bujqësore multifunkionale të Arsimit dhe Formimit Profesional (AFP) në Fier dhe përmirësimi e riorganizimi i shkollës së AFP-së në Lushnjë;
- ii. Zhvillimin dhe aplikimin e kurrikulave të AFP-së të orientuara nga tregu;
- iii. Ndërtimin marrëdhënies të qëndrueshme dhe të përshtatura sipas kushteve, ndërmjet shkollës multifunkionale të AFP-së dhe sektorit privat;
- iv. Sigurimin e koherencës me financimin e IPA II për sektorin e punësimit dhe aftësive.

Komponentët e projektit përfshijnë:

1. *Ngritjen e Qendrave Shumëfunktionale Bujqësore të Ekselencës* (Shkolla në Fier) duke menaxhuar e organizuar në mënyrë eficiente edhe shkollën teknike të Lushnjës, e rikualifikuar siç duhet në sektorin e agro-mekanikës. Ky aktivitet do të realizohet nëpërmjet këtyre nënkomponentëve:
 - Rehabilitimi i infrastrukturës;
 - Blerje mallrash (Pajisje & Laboratorë);
 - Asistencë institucionale teknike;
 - Asistencë për ministrinë e linjës.
2. *Zhvillimin e kurrikulave të AFP-së, të orientuara nga tregu i punës;*

Programi do të ndërhyjë në secilin prej tri niveleve të ofertës AFP në Shkollën e Ekselencës, me qëllim që të jetë në gjendje të adresojë të gjitha boshllëqet e identifikuar në lidhje me aftësitë në sektorin e bujqësisë dhe atë të përpunimit agro-ushqimor.

3. Futjen në kuadrin e sistem dual (të dyfishtë) funksional lidhjet e qendrës shumëfunksionale me sektorin privat, sidomos në bujqësi dhe në sektorin e përpunimit agro-ushqimor.
4. Ndërtimin e marrëdhënieve efëcente, të përshtatura specifíkisht dhe të qëndrueshme.

Marrëveshja financiare ka parashikuar ka parashikuar të drejtat dhe detyrimet e palëve të marrëveshjes në kuadër të realizimit të objektivave të saj. Autoritetet shqiptare mund t'i ofrojnë institucioneve të arsimit dhe formimit profesional grante dhe skema mikrokredie për të rinjtë sipërmarrës bujqësorë; skema të Shërbimit Kombëtar të Punësimit; akreditim për realizimin e moduleve të trajnimit; bursa; praktika profesionale të posaçme.

Ndërsa, ndërmarrjet italiane mund t'i ofrojnë shkollës AFP: trajnime ndërkombëtare; gjetje pune; binjakëzim me shkolla të tjera AFP; shkëmbim të praktikave të mira në lidhje me përfshirje për punë të nxënësve në nevojë.

Marrëveshja financiare parashikohet të rregullohet nga ligji italian dhe organi kompetent për zgjidhjen e mosmarrëveshjeve do të jetë Arbitrazhi i Dhomës Ndërkombëtare të Tregtisë.

Marrëveshja financiare është miratuar në parim nga Këshilli i Ministrave, me vendimin nr.195, datë 4.4.2018, dhe është nënshkruar ndërmjet palëve. Në përputhje me ligjin nr.43/2016, "Për marrëveshjet ndërkombëtare në Republikën e Shqipërisë", marrëveshja financiare paraqitet për ratifikim në Kuvendin e Shqipërisë.

III. ÇËSHTJE TË DISKUTUARA NË KOMISION

Gjatë shqyrtimit, nga ana e deputëve u diskutua mbi nevojën për paraqitjen e një informacioni më plotë në relacionin shoqërues të marrëveshjes lidhur me përfitimet nga marrëveshja, impaktimin social, dhe ekonomik që sjell marrëveshja, kjo referuar Objektivave të Zhvillimit të Qëndrueshëm të paraqitura në Axhendën 2030 të Organizatës së Kombeve të Bashkuara.

Nga përfaqësuesit e ministrisë së Financave dhe Ekonomisë, u theksua se nëpërmjet kësaj marrëveshje synohet të rritet numri i nxënësve që frekuentojnë arsimin profesional si dhe të realizohet riorganizimi i ofruesve të arsimit profesional në Qendra Multifunksionale.

Gjithashtu, anëtarët e komisionit, sollën në vëmendje të përfaqësuesve të Ministrisë së Financave dhe Ekonomisë nevojën për pasqyrimin në tekstin e marrëveshjeve, të organizimit të ri institucional dhe fushës së re të përgjegjësisë së ministrive.

IV. PËRFUNDIM

Në përfundim të shqyrtimit të këtij projektligji, Komisioni për Çështjet Ligjore, Administratën Publike dhe të Drejtat e Njeriut, pasi vlerësoi se:

Në aspektin ligjor, projektligji i propozuar është në përputhje me Kushtetutën dhe legjislacionin në fuqi;

Në aspektin procedural, projektligji është paraqitur në përputhje me Rregulloren e Kuvendit

dhe pasi e shqyrtoi projektligjin në parim, nen për nen dhe në tërësi, e miratoi atë me shumicën e votave të anëtarëve të pranishëm dhe u shpreh dakord për kalimin për votim në seancë plenare.

RELATORE

VASILIKA HYSI

KRYETARI

ULSI MANJA